

Ciudadanonan contento cu nan ta wordo envolvi den realisacion di Ringweg 3

E ciudadanonan cu a yena e sala di Centro di Bario Playa Pabao diaranson anochi pa e sesion di informacion riba construccion di Ringweg 3, cu ta core for di banda di aeropuerto te cu e zona di hotelnan, en general a keda hopi satisfecho cu Gobierno ta buscando participacion di pueblo. Proyecto Ringweg 3, conoci como Watty Vos Boulevard, cu ta pasa den barionan manera Cumana, Seroe Patrishi, Tanki Lendert, Ponton, Oranjestad west, Bushiri y yena na zona di hotelnan, ta den e fase final di preparacion prome cu bay destaho publico. Den un di e tres sesionnan publico cu Gabinete Mike Eman II ta organisando pa presenta e proyecto aki, tanto Minister di Infraestructura Benny Sevinger como director interino di DOW ing. Marlon Croes, a splica cu e intencion ta cu den e prome kwartaal di 2015 ta cuminsa ehecuto e proyecto cu lo tin un duracion di dos aña y mey. **Ringweg 3, cu ta birando realidad** despues di 40 aña, ta bay crea un cambio positivo den infraestructura di Aruba, unda e hende ta central y despues e vehiculo. Esaki a wordo splica na e publico presente diaranson ultimo. Un di e personanan cu tabatin un participacion activo tabata e ciudadano Yolanda Richardson, kende a haya e evento uno hopi bon y tabata desea cu e por tabata un poco mas largo. “Pero en general mi ta haya e tipo di sesionnan aki interesante y importante pa nos como ciudadano aporta na dje, sin

importa cual ta bo color politico,” el a bisa cu hopi enfasis. El a logra haci algun pregunta, specialmente e tabata interesa pa mantencion di naturalesa di Aruba. Pero tambe, mescos cu varios otro ciudadano, tabatin pregunta riba e parti di siguridad den trafico pa tur hende, tambe peatonnan.

Otro ciudadanonan, manera Errol Shak-Shie (ex director di DIP) a conseha pa na e otro anochinan di informacion, pone mapa grandi na muraya, permitiendo e ciudadanonan tin un miho bista di unda Ringweg 3 ta pasa y tur loke ta bay wordo construi riba e ruta aki. Pa Stanley Feliz e anochi “tabata sublime. Mi a haya hopi informacion cu mi no tabatin”, el a indica. Esaki ta un pensamiento comparti door di varios di e ciudadanonan presente. Un cara conoci e anochi aki tabata di dr. Livio Hermans, kende apesar cu e no a haci pregunta, na final di anochi a combersa cu e.o. ing. Marlon Croes riba algun detaye. Den un declaracion breve cu el a duna, Hermans a bisa cu e ta haya cu e tabata un anochi cu bon informacion y su preocupacion tabata si ta logra un miho fluho di trafico y un comunicacion “smooth” cu diferente areanan. “Mi ta kere cu un boulevard asina sigur lo por yuda,” el a comenta.

Proximamente lo keda anuncia e siguiente dos anochinan di informacion, organisa door di Ministerio di Infraestructura hunto cu InfraTeam.